

CHL 3149/9232.83

HARVARD COLLEGE LIBRARY  
FROM THE  
HARVARD-YENCHING  
INSTITUTE

JUL 11 1929

CHL 3149.9232.83

直隸新州志

卷四

人物

孝義

御

薦舉

寓賢

封贈

隱逸

列女

仙釋

災祥

祠廟

坊表

墳墓



忻州志卷四

知州賈容選編輯

哈佛大學哈佛燕京圖書館珍藏印

人物

周

韓厥晉景公時為司馬言於公曰成季之勲宣孟之忠

不可以無後於是公復立趙武而反其田卒謚獻子

無忌為公族大夫起代為卿其後卒分晉為韓國

公孫杵臼為趙朔客屠岸賈誅朔臼為朔友程嬰曰胡

不死曰曰朔妻有遺腹若男吾奉之故不死及生果

男賈開而索之曰與嬰謀曰立孤與死孰難嬰曰立



孤難曰我爲其易者乃取他人兒匿山中使嬰謬告賈曰與我千金告趙氏孤處賈使將隨嬰攻白曰謬曰小人哉程嬰縱不能立孤忍賣之乎賈遂殺白及孤其趙氏真孤乃在嬰處也

程嬰既謬告屠岸賈殺杵臼及廣孤乃抱真孤匿山中居十五年韓厥言於晉景公復立趙後是爲趙武卽孤兒也遂攻賈滅之嬰曰昔下宮之難我非不能死欲存趙後耳今宜下報宣孟慰杵臼遂自殺武涕泣齊衰三年奉祀不缺

趙武食邑於忻遂居之相悼公治叛臣歸侵地檀弓稱其退然如不勝衣言訥訥如不出口所舉晉國管庫之士七十餘家生不交利死不屬其子焉卒謚文

靈輒晉人趙宣子遊首山舍於桑翳見輒餓食之輒舍其半問之曰宦遊四方不知母之存亡請以遺母因與簞食肩肉已而爲晉宰夫宣子弗知也靈公伏兵攻宣子輒倒戈戟以禦公徒問其故曰翳桑餓人也問其名不告而退遂自亡

鉏麇晉力士晉靈公使賊趙盾晨往寢門闔矣盛服將朝尚早坐而假寐麇退而歎曰不忘恭敬民之主也賊民之主不忠棄君之命不信有一於此不如死也



觸槐而死

提彌明趙盾之右靈公飲盾酒伏兵將攻之明知之趨  
登曰臣侍君宴過三爵非禮也遂扶以下公嗾蔡明  
搏而殺之鬪且出明死之盾獲出奔

按靈輒鉏麇提彌明均非忻人然以其功存趙氏故  
七賢祠並列從祀因無所附姑記於此好古之士或  
有所考焉

魏

秦朗字元明新興人父宜祿爲呂布使詣袁術術妻以  
漢宗室女後歸降爲銓長隨漢將張飛去行數里欲

還遇害朗少隨母杜氏畜於公官曹公甚愛之及長  
游遨諸侯間歷武文之世而無尤也明帝初授以內  
官青龍元年五月爲驍騎將軍將中軍討步度根寇  
走漠北十月步度根部落戴胡阿狼泥等詣并州降  
朗引軍還遷給事中出入常隨從上每顧問多呼其  
小字阿蘇數加賞賜爲起大第於京城中富均公侯  
後劉放孫資薦司馬懿曹爽輔齊王乃罷朗官子秀  
字元良新興雲中人父朗魏驍騎將軍秀少敦學行  
以忠直知名咸寧中爲博士何曾卒下禮官議謚秀  
議謚法名與實爽曰謬怙亂肆行曰醜曾之行已與



此同宜謚諤醜公時雖不同秀議而聞者懼焉秀性忌讒佞疾之如讎素輕鄙賈充及伐吳聞其爲大都督謂所親曰充文案小才乃居伐國大任吾將哭以送師或止秀曰此不赦之罪乃止及孫皓降於王濬充未知人方以吳未可平抗表請班師與濬告捷表同至朝野以充位居人上智出人下僉以秀爲知言及充卒秀議充舍宗族弗授而以異姓爲後謚法昏亂紀度曰荒請謚荒公不從王濬平吳而爲王渚譖毀雖不從無明賞罰以濬爲輔國大將軍秀上言輔國之號率以舊恩此爲王濬無功之時受九列之顯位有功之後更得寵人之辱號也後與劉暉等同議齊王攸事除名尋復起爲博士秀性率直與物多忤爲博士前後垂二十年卒於官

按魏略三國志賈朗乃以朗子秀議賈充謚爲賈氏復讎非盡出公論也

晉

張宣子新興人識達士也同郡劉殷至孝勸殷就徵殷曰竭盡臣禮便不得就養宣子曰如子所言豈庸人所識哉而今而後吾子當爲吾師矣宣子故并州豪族家富於財將以女妻殷其妻怒曰我女年始十四



姿識如此何慮不得爲公侯如而遂以妻劉殷乎宣子曰非爾及也誠其女曰劉殷至孝兼才識超世此人終當遠達爲世名公汝其謹事之殷後爲晉新興太守錄尚書事時稱宣子知人

劉殷字長盛新興人高祖陵漢光祿大夫殷七歲喪父哀毀過禮服喪三年未嘗見齒曾祖母王氏盛冬思董殷時年九歲乃於澤中慟哭曰殷罪釁深重幼丁艱罰王母在堂無旬月之養殷爲人子而所思無獲皇天后土願垂哀愍聲不絕者半日忽若有人云止止聲殷收淚視地便有董生得斛餘而歸食之不減

至時董生乃盡又嘗夜夢人曰西籬下有粟寤而掘之得粟十五鐘銘曰七年粟百石以賜孝子劉殷自是食之七載方盡時人嘉其至性通感競以穀帛遺之弱冠博通經史綜核羣言文章詩賦靡不該覽性倜儻有濟世志郡命主簿州辟從事皆以供養無主辭司空齊王攸辟爲掾征南將軍羊祐召參軍事皆以疾辭同郡張宣子勸殷就徵殷曰當今二公有晉之棟楹也吾方希達如椳椽耳不凭之豈能立乎吾今王母在堂旣應他命無容不竭盡臣禮便不得就養子輿所以辭齊大夫良以色養無主故耳宣子遂



以女妻之張氏性婉順事王母以孝聞奉殷如君父  
焉及王氏卒殷夫婦叩殯號哭火遂越燒東家後有  
二白鳩巢其庭樹自是名譽彌顯太傅楊駿備禮聘  
以母老固辭駿表聞勅所在供其衣食蠲其徭賦賜  
帛二百疋穀五百斛孫秀夙重殷名以散騎常侍徵  
之殷逃奔雁門齊王問辟大司馬軍諮祭酒既至問  
謂殷曰先王虛心召君君不至今孤辟君君何能屈  
也殷曰世祖大聖應期先王至德輔世故殷希以一  
夫而距千乘今殿下以聖武睿姿除殘反政殷若復  
爾恐招華士之誅故不敢不至也問奇之轉拜新興

太守沒於劉聰聰奇其才而擢任之累至侍中太保  
錄尚書事殷恆誠子孫曰事君之法當務幾諫凡人  
尚不可面斥其過况萬乘乎夫犯顏之禍將彰君過  
宜上思召公咨商之義下念鮑勛觸鱗之誅也在聰  
朝恂恂然常有後已之色士不脩操行無得入門滯  
理不申藉殷而濟者百數有七子五子各授一經一  
子授太史公一子授漢書一門內七葉俱興北州之  
學殷門為盛竟以壽終

梁越新興人博通經傳魏初為禮經博士道武以其謹  
厚遷上大夫授諸皇子經明元初賜爵祝阿侯出為



雁門太守

北齊

庫狄干忻州人鯁直少言有武藝魏正光初除掃逆黨授將軍後從神武起兵破四胡於韓陵卒贈太宰配享神武廟庭

宋

輔超忻州秀容人少勇悍有力晉開運中應募隸澶州軍籍漢乾祐中從周祖討趙思綰攻永興城率驍勇十七人弁雲梯斫壞北門樓而入士卒繼進城遂陷以功補小校顯德中從太祖征淮南常執銳前驅轉

白騎副兵馬使宋初從平上黨再遷內直都知太宗選爲馬軍都軍頭征太原冒矢石攀堞先登身被十三創上嘉其勇賜錦袍銀帶帛五十段詰朝再乘城中流矢八復加厚賜襲范陽隸偏將米信爲田重進先鋒取飛狐蔚州遷馬步軍副都軍頭出補曹州馬步軍都指揮使領峰州刺史改欒州召還轉都軍頭淳化三年出刺德州坐事責授右監門衛將軍領誠州刺史加都軍頭領澄州真宗加領獎州團練使真拜萊州團練使以老願留卒年七十七何宏中字定遠先世居雁門叔祖青任忻州兵馬使因



家焉祖行宣西遊相傳遇僊行宣子子奇子霖政和中中武舉子奇秉義郎武州宣寧尉子霖忠翊郎守豐州安豐砦皆沒王事宏中子奇子也幼侗儻儀觀秀整雅以奇節自許爲太學武舉進士宣和末方臘擾江浙陳破賊三策徽宗褒諭已而破賊如宏中策遂知名宣和元年集英殿試策中第二調滑州韋城尉汴被圍獨韋不下兵退統制武漢英奏辟欽宗召赴軍前以路塞不果因請兵真定宣撫司時种師中兵已潰宣撫司檄副漢英守銀冶路既而太原破提兵並山而東將援汴俄漢英戰死宏中收合散亡立

山柵七十四所號令及千里艱食數月人不敢相食詔爲武節大夫河東河北兩路統制接應使是後金兵日盛所守唯銀冶一城金帥府募生致定遠天會五年二月糧盡被擒大帥昭刺憐其忠解縛授以官投堞於地曰我常以此物誘人出死力若輩乃欲以此嚇我耶帥嘉其不降屈又問欲還鄉否宏中謀南奔陽以願歸爲言會監送使臣愬之囚西京府君廟二年帥一日召授官又不拜使克軍不從取家屬填城黃龍府益偃蹇不行帥怒褫衣欲斬之定遠忻然就戮曰得死所矣擁之行已數十步帥終不忍召還



問爾授官不願克軍又不行填城又不行斬又不懼  
畢竟欲如何定遠徐曰生死在公奚問爲帥怒解繫  
之西京獄得州人保任數十族乃放歸請爲黃冠年  
六十三正隆四年歿自號通理先生著成真通理二  
集藏於家州將傅慎微後先贈詩云故人何定遠造  
物不虛生骨骼稜稜瘦詩篇字字清世皆遵道義我  
獨見忠誠尊酒分攜後何時蓋復傾朱少章輩皆推  
重之

金

張翰字林卿忻州秀容人大定二十八年進士調隰州

軍事判官有誣昆弟三人爲 劫者翰微行廉得其狀  
白於州釋之歷東勝義豐會 州令補尙書省令史除  
戶部主事遷監察御史毋憂 闕調山東路鹽使父憂  
起復尙書省都事戶部員外 郎大安間平章政事獨  
吉思忠叅知政事承裕行省 克左右司郎中論議不  
相叶累爭事不見省承裕就 逮衛紹王召見翰撫慰  
之改知登聞鼓院兼前職遷 侍御史貞祐初爲翰林  
直學士克元帥府經略官改 戶部侍郎宣宗遷汴翰  
規措扈從糧草至正定上書 言五事一強本當哀兵  
徒徙豪民以寔南京二足用 當按蔡汴舊渠以通漕



運三防亂當就集義軍假之官印使相統攝以安反側四省事縣邑不能自立者宜稍并之既以省官且易備盜五推恩以示天子所在稱幸之意上略施行之翰雅有治劇才所至輒辦遷河平軍節度使都水監提控軍馬使俄改戶部尙書庶事草略經度皆有條理是歲卒謚達義

陳毅忻州人明昌三年三月癸巳左丞完顏守貞言上嘗命臣問忻州陳毅上書所言事其一極論守令之弊臣面問所以救之之道莫之能言上曰方今正欲知其弊也彼雖無救弊之術但能言其弊亦足嘉矣

如毅言及隨處有司不能奉行條制爲人傭僱尙須出力况食國家祿而乃如是得毋虧臣子之行乎其令檢會前後所降條理舉行之

元德明號東巖秀容人唐禮部侍郎結之後幼讀書鄙事不挂口誠實樂易洞見肺腑布衣蔬食家人不敢以生理累之僮奴竊拾東家棗立督令還人負債往徃折券累舉不第放浪山水間終於家工詩清美圓熟集三卷

元好問字裕之太原秀容人父德明白幼嗜書口不言鄙事樂易無畦畛布衣蔬食處之自若家人不敢以



生理累之累舉不第放浪山水間飲酒賦詩以自適  
 年四十八卒有東巖集三卷好問七歲能詩年十四  
 從郝天挺學不事舉業淹貫經傳百家六年而業成  
 下太行渡大河為箕山琴臺等詩趙秉文見之以為  
 近代無此作也於是名震京師登興定五年進士第  
 歷內鄉南陽令天興初由尚書省掾除左司都事轉  
 行省左司員外郎入翰林知制誥金亡不仕為文有  
 繩尺備衆體其詩奇崛而絕雕剝巧縛而謝綺麗五  
 言高古沉鬱七言樂府不用古題特出新意歌謠慷  
 慨挾幽并之氣其長短句揚揄新聲以寫恩怨者又

數百篇兵後故老皆盡蔚為一代宗工四方碑板銘  
 志盡趨其門晚年尤自任著作以金源氏典章法度  
 幾及漢唐不可令一代之跡泯而不傳時金國寶錄  
 在順天張萬戶家願為撰述既而為樂夔所阻而止  
 乃構亭於家著述其上名曰野史采摭所聞有得輒  
 以寸紙細字記錄至百餘萬言今所傳者有中州集  
 及壬辰雜編後纂脩金史多本焉卒年六十有八著  
 文章詩若干卷杜詩學一卷東坡詩雅三卷錦機一  
 卷詩文自警十卷

王甫忻州人淳質有儒行生二子而妻死不更娶二子



未授室井臼事親貧居破屋蕭然而弦誦之聲不絕  
長子萬石次萬鍾俱有詩文名

王萬鍾字元卿秀容人父甫字用之通經史淳質有儒  
行貧居不蔽風雨而弦誦聲不絕亦以知醫見稱兄  
萬石字器玉住太學有賦聲萬鍾少有逸才讀書有  
後先不欲速成詩文閑適似其爲人客至清談終日  
人不敢以俗事浼之與同郡田德秀齊名號王田評  
者謂規製宏博王不及田而瀟灑無塵土氣田亦非  
王比也古詩尤蕭散有自得趣兵燹中皆亡失初貞  
祐二年甫歿與萬石居平晉金城里明年兵復至萬

石被害萬鍾欲收葬之時游騎充斥親舊勸勿往萬  
鍾流涕而去尋被禍年二十七人甚哀之

元

許楫字公度忻州人幼從元好問學年十五中詞賦科  
又舉賢良方正許衡深器重之爲陝西道勸農副使  
以京兆西荒田數千頃立屯田後提刑嶺北湖南辨  
富民賂佃代死者改提刑江南活俘民六百口還業  
摧徽州總管饑民柯三八等爲寇行省驛召輯撫諭  
降之

劉璧歷牧守遷本州兵馬都總管事知本府事蒞政仁



賢吏民懷畏

李得義忻州人幼有膽智長善騎射曉方略從軍取蜀  
屢建奇勛以武功贈中翊校尉

劉鏞至正間爲榆次尹以儒術飾吏治筆翰如流縣政  
一新時巨寇劉八忽等自陝潛入邑境鏞察其有異  
收之果服任滿遷去民立碑頌之

明

姜濤字伯源忻州人永樂甲午舉人除嘉興府同知代  
還督工口外補河間府同知未幾守以事罷民爭走  
闕下祈濤知府事遂授知府值外艱民復走闕下祈

雷任遷順天府府尹時祀典牲醴諸費悉供自民間  
濤請出庫錢供役先是濤赴京時有王同知者與有  
隙王死妻子以事械入京師濤聞飲食之待有加禮  
又前督工時有舊官按察者在役亦與隙見濤恐懼  
不敢前濤與執手道殷勤如平生歡人皆稱其長厚  
遷戶部侍郎以疾歸未幾起督漕運倉儲卒於官濤  
清介雖多貴顯家故無中人產卒之日不能具棺殮  
訃聞賜祭葬如例

宿冕字仲文忻州人鄉舉歷上蔡上元知縣陞戶部主  
事以平交趾督餉功擢郎中致仕孝友清介與楊寧



忻州志 卷四  
等三人里居結社

張軾忻州人有孝行親沒廬墓手植松栢成林宣德間  
舉賢良方正授甘泉簿歷洛川令綏德知州致仕又  
見孝行

楊寧忻州人永樂乙未進士授戶部主事陞本部郎中  
有清節及卒止遺銀帶一圍子敦尚氣節正統進士  
授雲南道御史以直言左遷新都縣有治稱孫玠有  
孝行

張蕙忻州人成化丙戌進士授句容知縣擢御史甚有  
風望按山東監試持法公嚴時稱得士陞浙江副使  
以廉直忤時歸

楊濬字德深成化戊午舉人歷官朝列大夫資治少卿  
居心耿介政尚嚴明所在立石誌愛云

黨承志字汝孝忻州人正德庚午舉人辛未進士授保  
定府推官有疑獄立爲判決擢刑部主事會吏部司  
屬缺員調驗封主事武帥導武宗巡行承志抗疏諫  
言甚激杖於闕下未幾陞稽勲司員外嘉靖改元預  
脩武廟實錄克晉藩冊封使不受餽遺陞驗封郎中  
議大禮抗疏忤旨復被杖調考功再調文選銓除擬  
注各量才器請託不行擢通政司右通政提督武職



錄黃丁亥值災異詔求直言上條陳四事勢要銜之  
以峭執論罷年七十三卒著忻州志

董芳郡人遷居崞縣進士歷官右都御史巡撫大同召  
爲刑部侍郎進尙書

喬良郡人鄉舉授曲陽知縣安貧嗜學苦節當官冬一  
裘夏一葛卽宦邸猶然灌園有賈客訟失布良命異  
邸舍抵門一巨石杖訊之觀者如市良佯言事不可  
白怒觀者各罰布償賈陰辨欵識遂得盜者擢隴州  
知州清節不渝

王致字邦器郡人歷許州訓導福山令工部郎中學正  
行方在許簡赴大梁書院教士有成效令福山大旱  
龜折禱雨立降禾盡起有訐狼噬其嬰者禱神捕之  
一狼就網若伏辜狀餘悉渡河去又有蝗不入境麥  
穗兩岐之異士民作歌頌之清節不渝以剛正忤權  
貴罷居鄉多厚德咸推重焉

周宗懿字心古郡人鄉舉歷寧晉紫陽知縣陞臨洮府  
判致仕孝友篤於家庭愷悌流於政事秉性醇篤處  
事寬和宦俸蕭然析之子姪竟鬻產以終餘年

王治字本道忻州人嘉靖三十二年進士官行人八載  
乃遷吏科給事中請臨陣斬獲第錄將士功文臣及



鎮帥不親搏戰者止賜賚從之再遷禮科左給事中  
隆慶元年偕御史王好問覈內府諸監局歲費中官  
崔敏請止之治力爭不許事竣劾中官趙廷玉馬尹  
乾沒罪詔司禮按問尋上疏陳四事一言定宗廟之  
禮獻皇雖貴爲天子父實未嘗南面臨天下雖親爲  
武宗叔然嘗北面事武宗今乃與祖宗並列設位於  
武宗右未協古典臣以爲獻皇祔太廟不免遞遷若  
專祀世廟則億世不改乞勅廷臣博議一議謹燕居  
之禮竊聞燕閑舉動有非諒闇所宜者宜重之其二  
亦切直時多躓焉居諫垣十五載擢太僕卿憂歸卒

### 賜祭葬

陳功字惟志郡人進士禠躬冰立執法霜嚴歷按詳讞  
惟明激揚不謬餽遺勿取舉薦謝金不納過家有里  
人進鏹以事托者叱絕之身後厥子稱貸叠見幾不  
保故物焉

劉漢郡人以武功歷官至大同總兵嚴明智勇屢建奇  
功爲邊將翹楚子本經歷官遊擊本義歷官都指揮  
僉事俱善戰多謀綽有父風人以爲不減楊業父子  
云

傅霖字應期忻州人嘉靖壬戌進士初授吏曹以宗親



改壽州知州請罷壽春驛正陽鎮巡檢並協助征島  
金米遷大名府同知再遷河南僉事備兵睢陳實倉  
廩簡材勇大計爲權貴所構罷歸神廟卽位謂曰者  
執政狗愛憎刺舉多不厭衆心命所司廉察以名上  
除平度州知州遷湖廣荆西道會中貴營顯陵費役  
萬計抗顏與爭並駁其履畝之舉艱歸補遼海兵備  
道二年復爲同官所構中以計典第霈以御史家居  
抗疏理其寃都御史亦以上聞詔以原官起用卒堅  
臥弗起居鄉立祭田贍族人煮粥哺饑者

王致祥忻州人萬曆初舉進士爲兵部給事中十三年

上言祖宗法非宿衛士不得持寸兵今日夕內操倘  
羣不逞挾利器出入禁門禍不細上留致祥疏卽日  
罷之累官右僉都御史巡撫順天卒

傅霈字應霈忻州人叅政霖弟忠鯁能任事萬曆丁丑  
進士初授咸陽知縣庫吏進羨金叱還之恐其中飽  
因取抵下戶丁徭補革亭革除縣櫃之役入爲監察  
御史巡漕河時內供增二十萬金猶不足將取諸房  
窖抗疏論之得中止按四川發大帥李大祥奸贓李  
橐千金求免卒論罷有職憲副者怠於官亦糾劾以  
去人病其執因告歸閉門纂晉文獻通志聞兄叅政



忻州志 卷四  
被誣特疏白之先是江陵當國鄒總憲元標以爭奪情謫都勻需數徃視爲措道里費

張泮忻州人萬歷丙戌進士耿介廉直居銓曹嚴絕餽遺終養二十年朝野想望其丰采屢起畱銓晉壘卿俱不出親歿從太原歸葬徒步哀泣感及行路尋補通政冊封藩王王肩輿過節前泮正色斥之劾不敬奪祿遷太僕卿薦守令一介不取晉光祿時閹豎弄權假內用旨破不費疏正其罪卒日遺橐僅十一兩殯墓不能具士論韙之子弘業死闖難另有傳孫凝和官生順天府通判

王治心郡人萬歷乙卯舉人任武城尹阻魏瑞建祠降階州學正復大名通判轉安慶同知署廬州府掌道篆流寇陷城父子四人同死

張宏業字印吾忻州人光祿卿泮子天啟間任撫標都司崇正甲申闖寇犯太原時年七十餘歲矣協守阜城門勇悍如少年賊鋒近或勸宜少引避不答事殲妻趙相向涕泣弘業意自若亟呼僮奴具晨飯飯已啟櫃袖一繩以出立城頭矢石間指畫方略比破人悉奔潰從容下入邏室中命壻某結繩梁間某懼甚手戴不能舉宏業笑曰孺子幾悟吾事叱之去閉戶



解佩刀引頸就繩以死是日趙亦自縊子凝和嘗官  
順天府通判分守北城亦死同時前衛指揮韓似雍  
十戶司鼎俱以協守殉

曹亨郡人天啟辛酉舉人初任清河令陞保定同知擢  
山海監軍道爲諸生時卽畱心政治利弊如條奏去  
馬頭立驛站革車戶長設廠夫鄉閭頌之及任縣令  
清慎供職勸稼興學民有遺愛豎碑追思至監軍山  
海政事之暇興起多士如梁公清標兄弟爲

本朝名宦皆素受教於門者後爲闖賊所獲露刃脇降  
罵不絕口不屈以死祀鄉賢

張凝和見上

郝芳聲忻州人舉進士崇正中知滋陽縣有治聲十五  
年閏十一月殉城獲贈卹以上載通志

楊戩成化甲午舉人初任通政司經歷陞陝西秦州知  
州南直淮安府同知湖廣常德府知府爲諸生時奮  
志力學剛方自守居官政尙嚴明吏民畏服在秦州  
有徹底澄清之謠

顏則孔忻州人官歸德同知崇正十五年賊犯歸德則  
孔死守城陷死之女聞之自縊見明史忠義王世琇  
傳



王堯臣三原縣知縣謫任崇化縣教諭篤學勤教陞西  
華縣知縣

國朝

傅山字青主別號石道人霖之孫明經之謨之子幼穎  
異讀書十行竝下古今典籍諸子百家靡不淹貫尤  
長於詩古文詞字法得二王之妙兼工繪事邃脉理  
性至孝友年十六爲諸生受知於學使袁袁山先生  
後袁爲直指誣奏詔下獄山乃赴闕伸寃天下義之  
甲申之變遂棄青衿遊行大江以南數年而返焚其  
著作日以醫道活人神奇變化洩素問之秘嘗習靜

於州之文昌祠迨康熙戊午舉博學鴻詞以老病懇  
辭復授中書職銜不受海內士大夫至晉者咸慕其  
丰采輿得一面以爲榮有購得其書畫者片紙隻字  
珍若拱璧焉從祀三立祠子眉博聞強識亦奇士也  
案先生世籍忻州母貞耄君陳氏娶亦陳氏皆州之  
陳村名族先生雖生於陽曲而徜徉寄跡恆在於忻  
不忘本也昔王績本龍門人其五世祖自太原徃至  
績則親族幾盡而後之脩太原郡志者猶錄東臯子  
傳况忻爲先生桑梓徃來之地其田賦猶存乎舊志  
偶遺今急登諸人物以樹忠烈之望云



史三榮少力學不倦順治乙酉舉人丙戌進士任山東  
兗州府東阿縣知縣明敏有爲東阿人刻其德政比  
之羊叔子云

張鍾英嗜古力學年未冠補弟子員順治辛卯舉人巳  
亥進士授湖廣武陵縣知縣時逆寇猖獗隨掛冠而  
歸優遊林下教授生徒州人高之

崔德爲前巳卯副貢順治二年授河南歸德府考城縣  
知縣首革船丁陋規時餘寇未靖凡一切軍務親身  
督理而士民不擾闔邑立石紀其德政解組後家居  
四十餘年非公不至當事稱爲高人第

趙家駿忻州人順治辛丑進士知南溪縣滇逆之變死  
於官家駿性樸直喜觀古忠孝節烈遺事宰百里以  
慈惠蒞民已而逆藩變前鋒至蜀家駿自度守禦未  
具而職司守土不可委之以去自縊官署克完節焉  
馬呈圖少孤有大志題壁云報國一心何日盡思親兩  
淚幾時乾中前壬午經魁授河南推官廉明著聲後  
遷保定兩臺列薦有操履一毫不苟揮霍八面俱優  
之句遷潤州司馬士民德之

楊敬儒庚戌進士康熙二十四年任臨湘縣秉性恬淡  
見事明決敢爲下車後值有裁革里長之議公慨然



以爲已任剔蠹除弊禁革冗費陋規不事獻朴而正  
賦輸將恐後里無追呼之擾清查屯荒招民開墾息  
民爭端脩砌城垣振舉廢墜刑清政簡月課諸生手  
自評閱居常自奉甚薄蔬食菜羹泊如也刻鄉約鐸  
書以化民成俗後行取監察御史清操愈厲舊志稱  
爲不負所學云

楊述康熙庚辰進士居家孝友處鄉黨周急濟貧人所  
依賴筮仕盱眙清察利弊革除陋規如帶征季鹽行  
戶之類悉行豁免一時有斷事如神之頌因前任鹽  
臬未結案誤歸里日與四方學者課文講義發揮聖

賢經傳微旨作制藝若干首以授來學論者謂昌明  
博大可方思泉云桐城張相國諱廷玉海寧陳相國  
諱世倌各有傳元配史氏繼配任氏均以賢孝著稱  
周繼殷己卯舉人賦性樸誠立品方正兩舉大賓以德  
行見重於鄉生平光明磊落直道而行聞難必恤見  
義必爲宗族戚友恆倚賴之授安邑縣教諭督課有  
方經指授者多登高第鳩功脩學兩閱寒暑工費不  
贍力復學益以給之至今多士恆思其遺澤陞潞安  
府教授有惜陰詩詞一卷

楊克茂癸巳舉人乙未進士歷官翰林院編脩孝行純



篤博學宏通潛心理學入詞林多著作有經濟才藝  
苑諸公咸欽服因丁母艱哀毀成疾事業未就而卒  
士林惜之

孝義

金

楊正德與弟庸德俱郎中天滋之子父歿兄弟哀毀及  
墓同廬墓側朝夕哭踊者三年金末兵亂 家免害  
人以爲孝感

樊寶天會間捐粟賑饑存活甚衆

明

孟彥和洪武間宋士廉等謀叛彥和以計擒之賜銀旌

功

張軾宣德年舉賢良方正歷綏德知州居喪廬墓又邢



政亦廬墓朱聰潛郝連俱有孝行

張昇西南隅都人成化間捐粟千石賑饑與鄉飲

王經木芝二都人成化間輸粟賑饑授義官腴產讓弟拾金還主人咸敬之

宿昶東北隅都人成化間施粟賑饑授義官

武謙治頭人素貧力作饒裕誓貸貲濟民債者不問利多寡貧者不責也歲荒施粟賑饑

周仲德正德間輸粟義官性孝友債不能償者焚其券賑貧周急鄉人賴之

邢銓西南隅都人好施與每冬構橋南河濟涉嘉靖辛

丑擄俘人口逃回過州餒不能行銓以餼糧給之全活甚衆

范永澄嘉靖二十九年助賑饑粟五百石又自捐一千餘石境內全活甚衆

張秉誠金山舖吳家堡人崇正時流寇入境所在屠掠村民欲逃竄秉誠獨言賊無定處逃將焉往乃聚集脩輯堡完設法守禦賊衆逼堡誠率衆勵志堅守俟懈奮力齊擊賊賊遂退後賊屢至誠拒守如前卒免賊難州守壯其人薦於代州睦總兵帳下委用獲功授守備以卒



范震崇正初流寇自河曲至共百九十餘人震率衆捍禦爲賊刺刃於腹罵不絕口而死知州張珩爲刻碑銘謚之曰義愍先生

趙徵庸本州武生饒胆畧多技勇崇正四年寇聚草塚山庸偵知之自請於當事者願剿滅之官給鄉兵五十人隨庸往庸挺身當先直搗巢穴賊與戰不利各望風逃竄不復敢嘯聚庸平冠下山馬被石蹶遂死州人哀之

曹貞麟廩生父爲流賊所戕負屍還走賊疑其有財迎刃哭曰寧殺我勿警父魂羣以爲孝子護送之其孫宗姬父早喪事祖母傅氏曲盡孝敬數十年如一日人又稱順孫焉

邢元貞元亨賣酒爲業誓不分居竭力養親以孝聞又生員梁田居喪邢昂割股俱以孝稱

呂新鎬父好施與常曲成之父老疾日夜不離側五年又馬雲以割股稱孝

郝登科髫年拾金還人又王敬王承碧俱還遺金趙裕心忻州人崇正中以孝被旌

以上俱載通志

國朝

李友直事繼母克盡孝道每有所往負之而趨值母病



篤嘗糞甜苦致神人賜瓜之異

楊黨生員順治初流寇餘氛未靖四出侵掠圍攻堡寨黨與勇士王袖戎貫及寧武人張三等奮身殺賊賊衆披靡因衆寡不敵黨等俱爲賊所傷惟張三無恙三頗有智謀率衆堅守多方捍禦堡卒以全村民至今頌之

楊文奇郡人痛父失明聞見必告純孝性生至老不改歿後哀慕感動族黨爲齊民所僅見云

趙肯堂郡廩生母早喪其父繼娶朱氏頗多嚴切肯堂小心敬事愉色婉容久而感化

張星禧郡人家最貧父娶繼室竭力奉事無異生母及星禧妻死以貧故無力再偶星禧子代婦職親操井臼以事繼母歷二十年不少懈三子俱列膠庠人以爲孝行所感

王作梁郡人孝友性成祖遺產薄梁躬任勤勞以共甘旨母卽世後事父彌篤父續娶繼母性悍頗加凌虐梁和顏承受從無愠色父稔其實陰詰以杖梁曰無之母遇我厚母聞慚悔待梁加禮有弟二人梁爲之娶妻置產後弟謀析居梁任其所取槩不與爭鄉里稱全人云



宿振義郡人母楊氏病嘗糞甘苦哀籲神明母病尋愈  
人以爲孝感所致

王伸仲郡人秉性孝友兄弟同居四十餘年善事繼母  
無忤時人義之擬於田氏焉

米如玉郡人格守庭訓克敦友于兄歿撫孤姪成立曲  
全嫂節人感義之

吳月桂郡人天性孝友事親存歿盡誠經府州獎溧水  
李夢龍有詩褒之

盧企聖西關人事母盡孝  
宿天爵州庠生父喪盡禮事母竭誠友愛諸弟撫之成

立鄉里推服

王屏州廩生事親誠孝友愛弟昆黨庠推重

高祿郡人事母周氏誠孝歷經獎勵其子庠生宗璧亦  
能紹述以孝行稱

楊廣生州生員事親誠孝

郭鎮歲貢生品行端方事繼母傅氏以孝聞友愛兄弟  
和睦鄉黨學使優獎郡人士多觀法焉

宿天德五齡失怙祖憐而食之每抱食不下咽祖問故  
曰欲以遺母祖甚奇之奉母三十年承顏順志宗族  
咸以孝稱與兄同居貿易多年家無私積子明如丙



辰舉人

張玉秀郡庠生孝行素著父軒病危秀聞五臺山有香泉可療病遂日夜步行二百餘里携水至父飲之果愈毋嘗病訪醫太原醫至曰須用病人子女之血爲引秀立刺股間血投之亦愈

盧宏福解原邨民篤志孝行友愛兄弟事繼母李氏克盡子職李嘗臥病日侍湯藥衣不解帶者逾年及沒哀毀三年不御酒肉嘗置義田里中以贍疾苦族戚鄉黨賴之

周于義國學生稟性剛方素行嚴正鄉黨望而敬之以義方訓子待族黨廓然一體尤善解推康熙十九年歲饑煮粥賑濟全活無數

焦浴暉廩監富而喜施康熙三十六年孟壽二縣荒流民至本村者給以衣食又四十二年本郡饑煮粥放賑外每人給米一升其他種種善行大都類此子天佑亦能恪守父志

彭瓏國學生素多義行有本村窮民二家皆以無度鬻妻瓏惻然力止之給以衣食並畀貿易之資至今兩家完聚皆瓏之力也嘗捐百金平蝦蟇坡建立茶棚行者便之



張毓賢幼秉至性事繼母以孝比長慷慨尚義焚券急貧鄉人重其行後長孫覺世次孫安世連登科第時以爲積德之報云

李昇鄉民嘗適陽曲遇貧民戚喜父母衰老子女尙幼忽病疽養生無資不得已鬻妻王氏議價四十五兩昇聞之卽如數輸銀與喜令母離散以保全一家性命焉

王說郡人其父用極官平陽守府年甫七齡卽知左右就養後事寡母曲致豐腆二十年如一日比任越支場大使前官貯鹽八萬零沒於海商灶苦累力詳訟

免辦解一應公項毫無騷擾在任八載場灶德之歸田閉戶朔望必肅衣冠拜君親其不忘孝敬忠愛如此

楊克明貢生小孤事母孝生養死葬克盡禮制教育弟姪友愛彌篤嚴慎律躬足跡不履城市刻苦勵學雜誦時聞午夜忻定學者經其指授多所成就云

盧業監生孝事繼母曲意承歡色養備至凡事稟命不敢自專因此完母之節表母之賢卒邀旌榮之典及遭喪終祥禫猶哀慕不已

李見龍生員家貧事父以孝聞父歿事繼母曲盡其歡



心待義兄友愛里人稱之

張文英監生好善樂施康熙二十九年歲饑煮粥濟貧  
全活甚衆

張珽郡學生孝事父母友于兄弟和鄉黨而訓後學士

子觀感咸知奮勵

係南高村廩生

聶登雲樊家野場故民家赤貧奉養雙親勉盡子職間

里稱之其子聶花亦能繼父志

太學生楊華祝爲人孝友

乾隆十年夏五月  
賜至性惇倫匾揚表

陳相國

封贈

明

王源以子清貴封奉政大夫浙江衢州府同知

楊忠以子壽貴贈文林郎鞞縣知縣

姜彥輔以孫濤貴贈通議大夫順天府府尹

姜唐卿以子濤貴贈通議大夫順天府尹

楊叔原以子寧貴封奉政大夫戶部郎中

宿大亨以子冕貴封承德郎戶部主事

張志禮以子忠貴封文林郎大官署丞

漫澄以子智貴贈文林郎良醞署丞



王師帝庠生以定安府儀賓封亞中大夫

董興以孫芳貴累贈資政大夫刑部尚書

董政以子芳貴累贈資政大夫刑部尚書

王綱以子讓貴贈文林郎沙河縣知縣

黨茂知縣以子承志貴贈承德郎吏部員外郎

楊璟以子濬貴贈文林郎新樂縣知縣

王鎧以子治貴累贈文林郎吏科都給事中

武珍以子尚文貴封登仕佐郎鴻臚寺序班

陳大法以子功貴封脩職郎行人司行人萬歷七年贈

文林郎江西道御史

王金以子致祥貴封兵科給事中

張言以孫泮貴贈大中大夫資治少尹光祿寺正卿

張守廉歲貢以子泮貴累贈大中大夫資治少尹光祿

寺卿

王信以子治心貴贈文林郎武城縣知縣

周應物以子潤貴贈奉政大夫龍安府同知

趙潤增廣生以子永志貴封文林郎平谷縣知縣

石永厥以子琳貴贈徵仕郎中書舍人

王應官以子鑰貴贈文林郎固安縣知縣

李萃芳教諭以子煥貴封文林郎密縣知縣



張應龍以子士濂貴封奉政大夫

張心古生員以子涇貴贈奉直大夫磁州知州

趙嘉續以子謙貴累贈奉政大夫兵部郎中

曹可舜以子亭貴贈文林郎清河縣知縣

盧現以孫維屏貴贈通議大夫河南按察使

盧文科以子維屏貴累贈通議大夫河南按察使

楊九經以子譽貴封文林郎平谷縣知縣

杜鵬以子應芳貴累封承德郎兵部武庫司主事

國朝

周輔成以子繼殷貴贈脩職郎安邑縣教諭

楊慎儒以子克慧貴贈文林郎平湖縣知縣

董讚以子全福貴移贈脩職郎太平縣教諭

楊閏以子敬儒貴贈文林郎湖廣岳州府臨湘縣知縣

周勗成以子岐熊貴移封登仕郎署順天府良鄉縣主

簿

趙宏玉以子方貴移封登仕郎天鎮縣訓導

陳遇文以孫兩儀貴移贈平陽府教授

陳範以子兩儀貴贈平陽府教授

王廷召以子宗貴移贈脩職郎直隸易州廣昌縣教諭

楊祥徵以子廷貴移贈脩職郎山西河東都轉鹽運使



河訓導

*[Faint bleed-through text from the reverse side of the page, including characters like '訓導', '山', '東', '流', '轉']*

寓賢

北魏

乙弗朗家上洛孝莊末避地居并肆間爾朱榮見而重  
之後隸賀拔岳封長安縣公卒贈太尉

五代

劉赤塘不知何許人有隱操不求聞達寓白馬山谷中  
今名赤塘谷

金

李治字仁卿正定藥城人登金進士第調高陵簿未上  
辟知鈞州事壬辰城潰治微服北渡流落忻崞間聚



書環堵人所不堪治處之裕如也世祖在潛邸聞其賢遣使召之且曰素聞仁卿學優才贍潛德不耀久欲一見其勿他辭及卽位欲處以清要懇求還山治晚家元氏買田封龍山下而渾源志謂治與元好問張德輝嘗遊龍山爲龍山三老之一今兩存其說

元

王思廉字仲常正定獲鹿人幼師太原元好問旣冠張德耀宣撫河東辟掌書記旋謝歸至元十年董文忠薦之世祖仁宗朝以翰林學士承旨致仕

隱逸

北魏

薛雲忻州人性嗜學不樂仕進隱州西南繫舟山讀書自適以終其身今名其谷曰薛雲谷

宋

劉易忻州人性介烈博學好古喜談兵韓琦知定州上其所著春秋論授太學助教并州州學說書不能屈志仕進寓號之盧氏習辟穀術趙抃復薦其行誼賜退菴處士易作詩琦每爲書石或不可其意輒滌去琦亦再書之尹洙帥渭延致尊禮狄青代洙遇之亦



厚治平末卒琦作文祭云剛介之性天下能合者有  
幾淵源之學古人不到者甚多其敬之如此熙寧訪  
察定戶役詔易家用處士如七品恩得減半示優禮  
云

金

元德明次山後幼嗜書累舉不第以詩酒自適放浪山  
水間平生多所著述

元

張惟善忻州人藏書萬卷隱居授徒出其門者多名人  
其墓銘曰於維先生學傳聖心文經是式詩雅斯欽

上希陳邵晦迹幽深

明

宿應陽郡弟子員博學苦心屢舉弗第詩文自適後學  
多出其門與王治輩爲詩酒之友徜徉終老

國朝

陳于帝明季廩貢少有才名安定王雅重之時宗室驕  
橫羅織平民每以一言排釋及流寇猖獗于帝勸王  
散財發粟招募勇敢用脩不虞王不能用及逆闖入  
忻隱晦逃匿莫從踪跡自後絕意仕進謝遣生徒不  
與外事罕有識其面者惟與傅青主爲友每過訪輒



流連不忍去一時稱為兩克先生

*[Faint bleed-through text from the reverse side of the page, including names like 王景哲 and 李鳴鶴.]*

薦舉

元

許楫見人物

明

王景哲洪武年間以儒人舉任陽江縣縣丞

李鳴鶴以儒人舉任淇縣三河知縣

常庸十年以人材舉任洛陽主簿

鏞威十三年以孝第力田舉任順慶府知事

劉惟一十五年以通經秀才舉任潭府長史

王大本十六年以秀才舉任東昌府通判



李執中十七年以秀才舉任趙城學教諭

李時舉二十年以人材舉任海門主簿

侯再榮二十年以孝廉舉任安東知縣

侯再文二十五年由老人舉任定州判官

王居鑿二十六年以人材舉任沛縣縣丞

霍威二十七年以人材舉任滑縣知縣

以上俱洪武時

尹正六年以人材舉任丹徒縣丞工部營繕司主事郎  
中

孫伯玉十八年以稅戶賢良舉任栢鄉主簿

張軾見人物

楊政由賢良方正舉任武城主簿

以上俱永樂時

李謙正統時以儒人舉任南京訪賢御史

張應魁崇正時以武功薦擢懷遠將軍山海關守備見

武階



節烈

元

李氏張惟善妻恭定間旌門

明

連氏辛興南都王子智妻旌門

郭氏辛興南都郝文昇妻旌門

張氏西南隅都生員劉晏妻孀居四十年旌門

郝氏辛興南都王大興妻旌門

楊氏生員李思明妻旌門

田氏北趙都葛志貞妻旌門



彭氏東北隅都知府楊戩妾經獎

劉氏胡蕭都主事銀鏡妻經獎

楊氏生員隆嘏妻經獎

劉氏李戩妻經獎

傅氏郝世傑妻經獎

銀氏楊時孔妻經獎

王氏東關都太學生傅康妻二十七而寡遺孤朝宣甫

八月矢志不渝卒撫孤成立後朝宣子霖震需俱登

科甲稱三鳳蓋王之遺報云

宿氏訓導張世福妻經獎

劉氏阮密妻經獎

田氏張天佑妻經獎

段氏周珽妻經獎

王氏東北隅都生員宿應室妻經獎

劉氏王永昇妻經獎

郝氏王加逢妻經獎

羅氏張諒妻經獎

王氏李宗祿妻經獎

智氏張濂妻經獎

張氏豆羅一都寇來觀妻經獎



郝氏智懷讓妻經獎

姜氏明宗室朱克燎妻經獎

檀氏東北隅都典膳楊灌妻經獎

彭氏東北隅都典膳楊希賢妻經獎

郭氏石大本妻經獎

童氏芝郡都李堯夫妻經獎

張氏西南隅都王聚福妻經獎

李氏任大兒韓嚴都任繼增妻因寇逼懼辱溺井死女  
任大兒守哭次日亦投溺經旌表

趙氏義井都常思孔妻守節四十餘年經獎

趙氏水馬都張梧妻因探夫妹行經山溝張玉寶欲污  
之氏力拒破寶頰村民張虎至寶走氏欲死其門衆  
勸之歸次日黎明仍至寶家投堦而死經獎

閻氏西南隅都劉宜妻年十九而寡遺腹生子乾清誓  
死不嫁以女工自給居室數椽不蔽風雨夏秋淋澇  
戴蓆抱兒中處始終一節人無間言

普氏西南隅都士人張瀾妻瀾早卒普養姑孝謹艱苦  
百狀志益堅勵訓子張弛成立

孟氏東北隅都張懷妻年二十六而寡哭夫喪明甘貧  
植節撫男景和景玉成立州里賢之



檀氏西南隅都士人王愷妻篤學早卒檀守節無玷撫男王治筮仕為時名流

張氏豆羅一都杜世珍妻生子杜江三日世珍卒張時年十八上無姑舅堅貞撫孤貧苦萬杖孀居五十年

溫氏明宗室朱克煦妻二十歲而寡孀居五十年

趙氏路村一都連芳妻年二十四而寡孀居五十餘年訓子有方

宿氏南北都李天秩妻年二十九夫亡誓不改適家貧女工自給守節四紀人無間言

周氏東北隅都陳勃妻年二十四而寡矢不再適侍奉衰姑撫育幼子內外無間

陳氏遠庄都周玠妻年二十三而寡無子撫姪為嗣守節四十餘年

劉氏索石都生員李爭芳妻年二十五而寡無子以姪為嗣事姑盡孝勤儉自勵辛苦備嘗改業亦保弗墜課嗣游庠孀居三十餘年

李氏西關都王益隆妻年二十二而寡子柱三齡氏藉女紅撫育守節三十餘年

武氏忻口都趙存周妻二十四而寡孝養衰姑備嘗艱苦訓子成家守節四十餘年



小錢兒楊村都馮世禮故妻張氏女族鄰馮汝楠窺其  
獨居強欲污之錢兒喊叫不從繼母趙回楠逸去世  
禮受賄秘其事錢兒忿恨自毒死

許東子白村都許文諒妻武氏女張萬錢與武氏有私  
因欲併污東子東子喊叫錢遁去武問之知爲錢也  
愧忿自縊東子痛毋憾錢搥胸數日而死

崔氏芝郡都生員李堯稷妻年二十三而寡以姪李世  
默爲嗣苦節四十餘年里人稱之

趙氏定遠將軍張宏業妻封淑人崇正甲申太原城陷  
氏知定遠必死驅侍婢女孫八人悉投井塞不能容

### 投纆死

國朝

王氏州民周銳妻順治六年姜逆亂氏偕衆逃避爲賊  
所獲氏徐徐從行紿至溝邊投崖死

米氏西南隅都一甲人劉源深妻年二十七夫亡守節  
四十二年康熙十二年建坊 旌表

楊氏索石都七甲人范璋妻年二十三夫亡守節五十  
年康熙二十八年建坊 旌表

王氏西關都七甲人張宿明妻年二十二夫亡守節三  
十三年康熙三十九年建坊 旌表



張氏西關都七甲人楊是奇妻年二十八夫亡守節四十七年康熙三十九年建坊旌表

李氏任方榮妻方榮商於奉天歷三十八年不歸氏奉養孀姑田氏婦兼子職後田氏壽終方榮歿於客所氏以無子窮嫠孝而兼節尤人所難云

侯氏芝郡都董狀妻婚配數年無子狀病謂氏曰我逝後爾必另覓所天氏曰脫不諱我當先死以絕君念後疾革氏果入幽室自縊時氏僅三十未幾狀亦卒夫婦合葬祖塋一時名流競爲詩歌明之

戚氏雙白留都民張所知妻廿五夫亡守節五十一年  
陳氏路村一都民吳扳桂妻年二十七夫亡守節四十四年

侯氏西西都民李繼先妻刁民王儀謀姦不遂遂污巖之鳴於官儀堅持其誣氏不能白因當堂刎頸死今墓在城南下社道巡撫某題其石云烈婦侯氏之墓楊氏北隸關都生員米貯妻年十九夫亡子纔週歲剪髮停棺以示必死後子長七歲就師讀書卽辭舅姑從容就義尤節烈中所難覩云

周氏孔妻年三十守節撫孤至八十餘歲卒  
馬氏東張村民趙章妻年二十五夫卒誓不獨生姑姑



論之乃強起苟延朝夕奉侍惟謹舅姑既歿喪葬悉力課子文晟文晟成學者文晟尤憤勵爲學中壬戌進士氏年五十九歲而卒族黨無不垂泪

董氏部落都民楊盛柳妻年十八夫亡中夜飲泣孝事舅姑心力並瘁遺孤楊全甫二歲教誡甚嚴遂遊太學守節五十餘年

史氏麻會鎮生員馬斗射妻生一女年十九斗射病劇欲引刀先刎家人止之斗射歿後茹荼堅守享壽八十二歲

張氏西張村生員李植公妻年十九適植公越十年植

公殂祖姑孀姑具在氏竭力奉養姑病告天願以身代撫孤嗣曾爲諸生升上舍守節五十餘年

王氏辛興南都史鑣妻年二十一而寡遺孤甫二歲氏撫孤成立事翁姑盡孝其子希程弱冠入泮未幾亦卒媳王氏堅守如姑一門之內稱雙節云

陳氏永豐鄉民陳汝聽妻十八適汝聽越七年汝聽病亡氏慟絕剪頂髮嚼指血投尸上尸牀爲動觀者警異孝事舅姑竭力奉養訓子嶙峋相繼入泮守節三十四年

胡氏解原都民盧瑕妻年二十夫亡子未匝月苦節勵



操孝事孀姑守節三十九年

邱氏孫董都生員楊弼儒妻年二十八夫亡閉戶自縊  
家人救甦姑苦慰之乃起事姑存歿兼子職訓子克  
光中壬子科舉人

焦氏鄉民陳文喜妻年二十三夫亡孝姑撫子守節三十一年

陳氏部落都生員王維新妻維新卒子幼哀痛欲殉舅  
姑慰之乃止姑染疾不能行氏手扶數年翁姑歿喪  
葬盡禮親荷畚鍤見者傷感訓子定邦弱冠入庠守  
節四十年

楊氏淤趙都民董嘉妻年二十一夫亡矢志苦守家無  
擔石織紉苟延守節五十餘年

呂氏隸庄都生員崔璋妻年二十三夫卒翁姑欲焚璋  
書籍氏泣曰姑存之以待穉子訓子廷輔執編慟哭  
遂得勵學入泮守節三十餘年

張氏部落都民楊彪妻彪卒時氏年二十五家徒壁立  
氏承事繼母撫孤楊元根成立守節四十餘年

周氏部落都武生楊彬妻年二十夫亡矢志不移事舅  
姑曲盡誠敬撫孤楊元榮成立守節四十年

蔚氏部落都民王元弼妻年二十九夫卒家貧無子矢



志不嫁孝事舅姑守節三十餘載

胡氏永豐鄉生員楊在泗妻年二十一夫亡無子翁姑繼歿喪葬盡誠守節四十餘年

趙氏西關都民楊煒妻生長村墟舉動端重年二十八夫亡守節四十餘年

朱氏西南隅都生員王師帝妻年二十七夫卒事舅姑存歿有禮課三子皆就學問守節三十餘年

彭氏奇村都民王紹妻年二十一紹病危囑氏三年後嫁氏曰君命亂耶我斷不爲未幾紹卒無子氏侍奉繼姑撫紹幼弟守節三十餘年

盧氏北遼關都民劉弘妻年二十四而寡守節三十餘年

劉氏北遼關都石俊妻年二十而寡守節三十餘年

郝氏閻氏部落都民陳大貴妻妾也大貴卒郝氏年二十九家寒無子女閻氏年纔二十二同心堅守寢食不離棺柩舅姑歿躡踊哀號竭力祭葬郝年六十九卒閻號呼痛絕又十餘年七十九歲亦卒寒谷雙松風霜不改尤爲節烈中所僅見云

李氏集賢鄉盧正妻年二十八夫亡家產式微族黨欲爲氏謀氏闔戶自縊家人覺之排闥救甦遂無敢以



改適勸者垢面毀服藉女紅以供菽水課一子極嚴  
守節四十五年

馬氏索石都生員趙瑒妻守節五十餘年

韓氏依提民甄維常妻守節四十餘年

范氏路村一都連湛源妻守節五十餘年

楊氏東北隅都宿九霄妻守節六十餘年

岳氏西關盧振桂妻守節四十餘年

王氏東北隅都李雲鵬妻守節四十餘年

王氏東門張英文妻守節五十餘年

王氏西南隅都劉名顯妻守節五十年

索氏周氏解原村胡敏行妻妾同守節四十餘年

李氏北關米大惠妻年二十夫亡守節五十餘年

楊氏胡蕭都康萬里妻守節三十餘年

王氏南北都廩生侯定邦妻守節三十餘年

周氏北遠關葛天清妻守節四十餘年

張氏遠庄都周繩殷妻年十九結褵未及一載夫亡孝

事翁姑撫遺腹子教育成立守節四十餘年乾隆七

年旌表建坊

杜氏白石村貢生盧起用妻年二十四夫亡守節五十

二年乾隆九年旌表建坊



馬氏東南都焦養初妻年二十七守節撫孤四十五年  
乾隆九年旌表建坊

楊氏焦清儒妻清儒乃焦養初之次子也氏二十二歲  
守節同姑馬氏矢守堅貞終始不渝一時稱爲雙節  
云乾隆九年旌表建坊

董氏故郡董儒林之女許字匡村李克顯之子李暲爲  
聘妻未及過門暲已病故氏方一十七歲痛夫主之  
未建憫孀姑之無依遂詣李門恪循婦道辛勤五載  
竟爾殞逝疾革時猶以未獲終養爲憾乾隆九年  
旌表建坊

銀氏北胡村增生趙克功妻二十一夫亡孝事翁姑撫  
育弱嗣守節四十七年

任氏生員楊芳聲妻二十九而寡守節七十三年壽享  
百有二歲康熙五十九年奉

旨建坊貞壽之門

柴氏本城王鼎隆妻鼎隆遠歷兵馬營渺無音信氏竭  
力供奉病翁起居輾轉胥賴氏背負扶掖八年未嘗  
有懈生養死葬毫無遺憾鄉里稱之

沈氏苗庄村蕭亮妻二十而寡守節五十餘年

彭氏赤水村劉自福妻二十一而寡守節四十餘年



張氏北宋村郭宏思妻二十四而寡守節六十九年

頡氏遠庄周自美妻二十五而寡守節三十七年

姜氏在城寇君榮妻二十五而寡守節三十三年

盧氏西王家庄陳有仁妻二十六而寡守節三十八年

銀氏北胡村何如魁妻一十七歲而寡守節五十七年

牛氏北胡村趙份妻二十一而寡守節三十餘年

郭氏故民王興和妻二十八而寡守節五十餘年

王氏西馮城民岳壑妻十九而寡守節五十年撫週歲

子艱苦備嘗迄於成立

宿氏向陽村民田啟元妻二十二而寡無子翁姑年老

家計蕭然氏竭力承歡毫無怨悔守節四十餘年

陳氏匡村民師宰妻二十八而寡無子僅生一女念瞽

姑在堂女工度日菽水承歡守節三十餘年

陳氏北遠關民劉璧妻璧因家貧貿易他所時翁年老

臥病不起氏晝夜扶持三載無怠聞者感嘆

周氏匡村民葛天欽妻年二十七而寡守節五十餘年

孫氏郝茂才妻年二十一姑早喪遺三子皆幼賴氏撫

養時茂才傭工於外病故柩歸氏即自縊

陳氏郝昂妻年二十歲家貧昂傭工於外病故柩歸哭

拜畢入室自縊



李氏村民曹九會妻年二十夫故守節四十餘年

胡氏李秉恆妻年二十六秉恆客死京師氏卽絕粒以死相從既念姑老子幼家貧乃守節灌園爲生歷今五十餘年

宿氏河管村民張嵩妻年十九夫亡守節四十餘年

阮氏毛有倫妻二十二而寡守節三十餘年

董氏生員周青雲妻年二十八而寡孝事孀姑教育三子相繼成名守節五十餘年

朱氏周承胤妻明宗室壽庵女也二十五而寡遭明季家業傾圮備極艱辛潔清之志守死不變

姜氏下社民趙銑妻十九而寡守節四十餘年

李氏安邑民趙知止妻二十三夫亡守節四十年

索氏故民甄奇常妻二十七夫亡守節五十年

王氏州民賈鐸妻年二十六夫亡守節三十餘年

王氏東北隅宿雲昭妻二十二而寡守節三十餘年

李氏南北都李宏毅妻二十五夫亡既墓翁姑兼喪子媳撫育弱孫迄於成立守節六十二年壽八十六歲

李氏焦家庄民焦九鼎妻年三十夫亡守節四十餘年

趙氏石家庄民段養仲妻夫亡守節歷四十年

李氏解原村民盧天雲妻二十八而寡守節四十餘年



王氏索石都趙步雲妻二十七而寡守節四十五年

常氏遊邀村民張介妻二十四而寡守節四十餘年

王氏董村民楊元德妻二十而寡守節四十年

張氏西南隅民王立政妻二十八而寡守節五十六年

楊氏李氏國學生張德俊妻妾也夫死七日李生一子

林二人同心撫之早年入泮人稱雙節云

李氏逯庄民周爾釗妻二十五而寡守節五十年

胡氏劉氏胡劉從堯妻劉其媳也從堯逝時胡年二十

八遺子劉丹方在襁褓氏百方撫養及長娶媳劉氏

年二十甫生一子丹又逝胡中腸痛裂媳反溫言慰

解甘心同節孝養備至後胡年逾八旬劉亦年逾五

十一時稱兩世雙節焉

盧氏芝郡民董香妻二十七而寡守節四十餘年

張氏東南隅民焦九思妻二十七而寡守節四十餘年

張氏董村民郭寶皇妻二十五而寡守節五十餘年

劉氏鄉民宿明妻二十四而寡守節四十餘年

楊氏東樓村民張文演妻二十四而寡守節五十餘年

宮氏南關民張作棟妻二十九而寡守節四十三年

鍾氏金山鄉民趙唐妻二十六而寡守節三十餘年

趙氏鄉民張採妻二十六而寡守節四十年



張氏南高村民孫宏妻妻二十二夫亡守節四十餘年  
焦氏生員劉浩福妻年十六而夫亡守節五十餘年

張氏東呼延民蘓映陽妻二十二而寡姑病子幼竭力

養育比姑亡既葬哀痛而絕年五十有三守節三十

一年

曹氏麻會鎮故民馬大文聘妻大文外出不歸其翁姑

以空房娶之執婦道甚謹及聞夫凶問尤勵節操以

婺女代子職歷今三十餘載現年五十一歲有傳載

藝文

仙釋

比魏

智仙姑永安間副尉智重顯女幼耽空寂年及笄不嫁

禍福多前知問之不語一日入山坐化建塔藏之今

東南山曇陽寺有仙姑塔

元

王志常忻州人幼時牧牛田間遇異人挈之而行遠至

河南天壇之陽臺宮後八年來歸父母驚喜疑其死

而復生遂度為天慶觀道士氣質渾厚信受道士之

器年近九十留頌而逝見元好問天慶觀記



李之和元真觀道士博學工詩嘗與元遺山李牛臺賡  
和人謂其有仙風道氣云

五公者天公地公宋公退公竊公莫知所從來愛聖阜  
之勝各就一山脩鍊迄今以五仙名洞名鄉五公名  
案以上仙

唐

釋元奘卽三藏緹氏人俗姓陳名禱年十一誦維摩法  
華慕大法達長安住莊嚴寺西踰劍閣達蜀都受諸  
經論一聞不忘遍遊荆揚訪道復還京輦貞觀三年  
奉勅往西域取經六百餘部十九年還京住玉華寺

翻譯經藏後奘如臺山覽勝往來定襄弔藏孤故址  
建保孤祠徜徉白鹿原而去麟德元年告其僧衆曰  
有爲之法必歸曆滅沍影形質何得久停行年六十  
五必卒玉華曷墓我於白鹿原尋果逝兩月而色貌  
不變弟子以奘遺命移墓焉今其墓尚存土人呼  
和尚圍

宋

舍利和尚慶歷四年至橫山興國寺作院壬每日吾欲  
焚身特需其候明年正月十八果用三昧火自焚得  
舍利數粒鄉人建塔勒碑識之



懶牧和尚忻州人住興國寺戒行精嚴後僧從南方來  
彌獲聞深密諦天德中書偈而逝茶毗得舍利建塔  
城西原有見其杖錫相隨者云

慧英和尚號木庵居龍門山寶應寺有精行趙王欲見  
之英先覺命徒曰當負我出山至金門寺回視則山  
崩矣其徒負至端坐而寂

元

法空漢川人俗姓古出家遊忻州依懶牧和尚居萬安  
禪院日誦寫華嚴經元大德中微疾誨徒出頌畢奄  
然而逝茶毗得舍利十餘粒

了空忻州人姓王氏幼神異年二十遠遊後出家華蓋  
寺能前知嘗遇僧云脩行當學最上乘前知特小乘  
法耳又數年遂大徹悟一夕作偈曰無物本來真身  
心何處尋人法雙亡却虛空現法身遂逝茶毗煙騰  
五色衆異之

以上釋



灾祥

晉

咸寧二年六月白龍二見九原井中 三年閏七月新

興雨雹

太康六年十月新興山崩水涌出

元康五年九月新興大風傷禾稼

永寧元年七月新興青蟲食禾葉甚者十傷五六

元熙元年正月新興郡獻白雉十二月又獻白雉

北魏

延興元年十一月肆州秀容郡民獲麟以獻 三年秋



秀容郡民婦一產四男四產十六男

太和七年三月肆州風霜殺菽四月地震有聲九月暴

風折木 八年四月肆州蝗暴風 九年六月肆州

殞霜

正始元年肆州獻三足鳥 二年九月肆州獻白兔

三年九月肆州獻白兔

延昌元年四月秀容郡地震陷裂山崩泉湧傷人畜十

一月肆州地震 二年四月秀容郡地震山鳴至三

年正月不止 三年三月肆州獻一角鹿

熙平元年赤鳥見秀容郡三月肆州獻白鴉白鼠十一

月又獻一角獸

正光三年六月肆州獻三足鳥 八年肆州獻嘉禾一

穗六莖

天平三年八月肆州殞霜大饑 四年肆州大旱 八

年四月肆州霜旱

元象元年肆州獻白雀

北齊

武平六年肆州多狼食人

唐

永徽二年十一月忻州地震



宋

景德六年忻州秀容定襄二縣民田禾合穗  
天聖六年忻州禾異本同穎

景祐四年十二月忻州地震吏民壓死者萬九千七百  
四十二人傷者五千六百五十五人畜擾死者五萬  
餘

寶元元年正月忻州地震定襄地震壞城郭覆廬舍壓  
死者數萬人

慶歷三年五月忻州大地震 四年五月忻州地震西  
北有聲如雷 六年七月雨壞忻州城壁定襄縣嘉

禾隔二隴合穗

熙寧九年秀容禾間四隴同穎

元祐二年忻州禾異畝同穎合穗

崇寧元年忻州禾合穗

元

至元十七年五月忻州蝗 二十一年七月忻州西北  
有赤氣蔽空如血逾時方散 二十三年八月忻州  
東北夜有赤氣亘天中有白色如蛇形徐徐而行逾  
時方散

泰定元年秋忻州定襄縣殞霜殺禾



至正二年忻州大旱 三年三月至四月忻州風霍晝  
晦 大饑人相食 十一年四月忻州地震聲如雷  
震地房屋壓死者甚衆 二十六年七月忻州地震  
有壓死者

明

宣德七年蘭村民武煥家馬生駒鹿耳牛尾玉面璠蹄  
肉紋如鱗頂骨中起撫按于謙徐傑表進於 朝

宏治六年三月大風晝晦

正德七年黑膏災

嘉靖十九年山中桃李冬花 三十四年十二月地震

有聲自西南來居室動搖

萬歷八年大疫 十六年六月地震有聲自西北來壞

垣屋 十九年三月有火自東南流墜西北 二十

九年八月殞霜殺穀大饑 三十二年六月雨霽

四十三年北胡村河水泛溢冲塌房屋 千間淹死

人畜漂沒雜粟無算 乙酉年大荒米珠薪桂人至

相食郡人叅政傅公霖施粥百日米費四百斛所居

前後左右諸貧生賑米銀二十鏹知州傅公震施粥

費米百斛辛丑壬寅年復大饑霖於小彌陀寺焚大

地炕收宿貧人有死亡者施棺塋埋復施粥起冬月



至來年熟乃止費如前

天啟四年春地震異常房屋多毀

國朝

康熙十九年六月無雨霜旱歲稔斗米四錢煮粥賑饑

蠲免本年地丁錢糧又遣官散賑大口四錢八分小

口二錢四分二十年歲大有麥兩岐每畝收二石

餘二十二年十月初五日地大震官舍民房多毀

壓傷人畜二十六年十月辛庄村民張梅妻一產

三男俱存二十七年六月雹蠲免石嶺關以北地

丁錢糧三十三年歲大有秋穀每畝收三石餘

五十一年蠲免通省地丁錢糧六十一年三月夜

忽紅光燭天有星流西南大如斗震聲若雷

雍正八年歲大有夏麥秋穀俱二三石不等蠲免通省

錢糧四十萬兩九年蠲免通省錢糧二十萬兩

乾隆十三年蠲免通省錢糧其大同朔平二府屬米豆

概行蠲免其餘府州縣俱蠲免十分之三



祠廟

城隍廟

治西明洪武三年改舊郡治建封靈佑侯碑存

東嶽廟

城西岡

代嶽廟

在雲口內

五嶽殿

在合索村東

三官廟

城西北隅

二郎神廟

北門內

三靈閣

一在治西一在北郭神乃孚靈侯唐宏威靈侯葛

雍泱靈侯周武也以周厲王拒諫客吳楚侵吳三

人以神策退兵不受封賞宣王立復歸周有靖難

功遷東克治民有政績並加侯封宋真宗賜號三

元真君有



龍王廟

東門內村落所在有之

關王廟

西門內北隅

蚩蚘廟

治西北三十里土陵橋此八蜡中司昆蟲者以四月八日祭遇蚩蚘生鄉人禱祠即有白項鴉鳴蚩

土潛藏

龍天廟

治西北三里烈士廟左相傳即晉文公祠

阿母廟

南郭內西楊維嶽云按舊志謂程嬰妻今神列三像乃司嬰兒者所在有之恐非

獨擔神祠

在本山

文昌祠

西岡舊文廟側

魁星閣

舊在西門明萬歷時改建城上東南雍正三年又建一閣於西城文昌祠之右

烈士廟

治西北三里明嘉靖三年僉事李公濂命建祀趙盾韓厥程嬰公孫杵臼鉏靈輒提彌明七人有

程嬰祠

見上一在金山

碑贊有司春秋祭

公孫杵臼祠

見上一在城西七里逮丘

武安王廟

治西南明萬歷三十三年重脩規制宏麗

潤國濟民侯祠

在遊邀村即尹鐸

包孝肅祠

北門內

萬老生祠

南關外

魏中丞祠

北門內

速報祠

在城北門內太原志有此祠今廢

關帝廟

雍正三年奉旨建立在南門舊關帝廟內東畔有司春秋致祭

行州志

卷四 祠廟

三



寺觀

興國寺 在治後唐儀鳳年建明洪武初設僧正司於此

定和院 在匡村

白馬寺 在奇村俗傳程嬰為白馬天神

文殊寺 一在治東北一在治西一在南郭四鄉多有之

福田寺 在繫舟山即元德明讀書處志云東巖夜月者是也四鄉多有之

大悲寺 在南郭外西 福勝寺 一在西張一在韓嚴

崇明寺 在温村 三藏寺 一在依提一在蘭村

華嚴寺 一在嘉禾一在六石 圓明寺 在東呼延

智門寺 在路村 崇福寺 在木芝村

普和寺 在水馬 千佛寺 一在雙堡有松數百株一在遊逸



傘蓋寺

在馮村後唐初建附山植松百餘株志云青松傘蓋即此

香泉寺

在路村西三鬼山唐元化年建志云紅葉香泉即此

寶香寺

在忻口馥香山 法雲寺 在水芝村

天王寺

在馮村 永安寺 在東高

大明寺

在南高 阮監寺 在董村

觀音寺

在部落 崇化寺 一在流江一在上下

聖壽寺

一在奇村一在白石 七峯寺 在孫村

壽聖寺

在寺庄村 洞元觀 在嘉禾村元大德年

天慶觀

在城內西岡上宋祥符中建詳見元好問記中明

玉清觀

在水馬明萬曆時護道正司印一在傅家庄

陽明觀

在原頭村 玉陽觀 在頭村

大清觀

一在碧色村一在嘉 大微觀 在白村

忠烈寺

在遠庄祀忠智候公孫杵白金進士南陽何師常撰碑記尚存

楊維嶽曰甚哉浮屠之惑人深而宗其教者之敗俗

大也郡境村落約三百許皆有梵寺數楹最小者亦

斗室供香火僧無精行貧民為僧傭作者挈妻傍居

流娼儼居僧舍蕩子諧狎藉資衣食者更從史之深

可抱腕緣元代素崇佛教故濫觴至此計非廬居人

人不可第鄉人就此避虜歲時祈報未易議革也

周人龍曰僧道亦人耳不幸陷為僧道豈能并人食



邑之性而除之楊公所云豈獨忻為然天下之僧道  
 其不犯此者鮮矣或倖而不罹於法耳人人廬居未  
 易言抑其強而汰之可也孟子曰能言距楊墨者聖  
 人之徒若楊公者其庶幾歟

坊表

明

九原名郡坊 在州治前

司寇都憲坊 刑部尚書董

登科坊 楊銘

旌賢坊 主事楊壽

進士坊 楊寧

繼美坊 漫智

進士坊 俱楊數

文魁坊 漫智

騰霄坊

昂霄坊 王玉

登雲坊 彭鑑

鳴鳳坊 閻濟

凌漢坊

敘錦坊 張璿

鄉貢進士坊 樊昭

文光坊 楊濟



登庸坊 王堯臣

鵬程坊 黨茂

虎榜題名坊 黨盛

世科坊 張鑰

進士坊 繡坊 俱張蕙

經元坊 進士坊 俱銀鏡

鸚鵡薦坊 銀臺贊政坊 俱楊戩

繡衣坊 楊宗

世美坊 楊琰

濟膺天寵坊 誥封吏部員外郎黨茂

父子濟美兄弟聯芳坊 為黨茂黨盛黨承志黨承賜立

科第傳芳坊 楊珽

國士坊 進士坊 俱黨承志

進士坊 柱史坊 俱黨承賜

進士坊 連登科第坊 俱王治

恩綸賁德坊 誥封給事中王鑑

祖孫繼美坊 為王清王堯臣王治立

臺憲追榮坊 誥封柱史陳大法

鯤奮春漢坊 鸚鵡橫秋漢坊

清朝柱史坊 俱陳功

二星坊 在南門內九原驛巷口今廢

九原通運所坊 在東街路南今廢

晉烈士祠坊 在北郭西巷口今廢

鴻儒節婦坊 旌表生員劉晏妻張氏

寵褒貞節坊 旌表生員李思明妻楊氏

貞節坊 一為王子智妻連氏王大興妻郝氏俱在

一為郝文昇妻郭氏一為麻會鎮一為葛志貞妻田

趙村 氏在北

國朝

存趙孤處坊 北關中

程嬰故里坊 北關外又書公孫杵臼邑此二坊俱康熙

韓獻子遺風坊 南關外又書靈輒禦難處此係州牧柯建今廢



墳墓

周

晉卿韓獻子厥墓 治南十五里韓嚴村今有韓家溝其故里也

晉義士程嬰墓 治西南原上舊有祠久廢 按程嬰輩雖晉國人然大統在周民無二王舊志

作晉設今正之

晉義士公孫杵臼墓 治西北七里潞庄南庄即杵臼中社也有祠碑記存

晉

郡守墓 治西三十里土陵橋西姓名無考 按舊志謂郡守即好妨神好妨廟所在有之疑守墓近廟

因而附會耳

魏



太尉錄尚書事劉貴珍墓 治西九原岡上

北齊

將軍贈太保庫狄于墓 西門外八呼宰王墓 按史子

庫狄引墓 河子頭村東

金

駙馬田顯宗 立羅村南顯金 駙馬陝盤屋縣得力村人

知制誥元好問墓 韓巖村北 郝經撰碑存

元

元帥畢威墓 治東十五里雙堡西北官元帥碑存

解仲公墓 溫村西官離石縣 尹達花赤勸農事優復鄉 永安庄人也 按鄉庄無考

明

晉恭王夫人樊氏墓 治北三十里河管村西北

定安悼隱王成鱗墓 治西七里

王長子聰涵墓 河管村西北舊作兩截山陽誤

鎮國將軍聰潛墓 析府治西性至孝慕其母作高樓日 登望之郡守王軒扁曰望萱

鎮國將軍聰濂墓

輔國將軍俊楛墓

輔國將軍俊麟墓 皆九原岡

刑部尚書董芳墓 治東十五里雙堡村

戶部侍郎姜濤墓 治東北三十五里解村



巡按山東浙江按察司副使張蕙墓治南二十里豆羅村

通政司右通政黨承志墓

御史黨承賜墓

太僕寺卿王治墓治西南五十里南張村賜祭墓

龍安府同知周瀾墓治西十里河子頭北岡

御史陳功墓治東北二里

工部郎中王致墓治南二十里麻會鎮

國朝

東阿縣知縣史三奎墓

武陵縣知縣張鍾英墓

考城縣知縣崔德為墓

南溪縣知縣趙家駿墓坐本郡永豐鄉北胡村東北

潤州同知馬呈圖墓

御史楊敬儒墓

盱眙縣知縣楊述墓州治四十里鶴索村東南觀音凹  
乾向坐山下松栢成林墓中得

潞安府教授周繼殷墓治東二十五里董村

翰林院編脩楊克茂墓

附記

哀邱金末兵間暴骨狼籍宣撫劉易令道士王恆心募  
痊成邱名曰哀邱今迷其處

漏澤園一郡屬壇後一北關外西



明漢州知州楊譽墓州治五里部洛村西南卯向松栢成林

義塚

北關外 按此係本朝州裝柯捐俸置厠銀十五兩買生員張慶麟地十四畝二分



1844  
1844  
1844